

# **Reglament davart il diever da l'intelligenza artificziala (IA) en la SRG SSR**

## **Intent e champ d'applicaziun**

Quest reglament d'IA da la SRG SSR definescha ils princips fundamentals per il diever da l'intelligenza artificziala (IA) en la SRG SSR. El vala per tut las collavuraturas e tut ils collavuraturs. En furma dad instrucziuns d'agir dat el ultra da quai respostas concretas a dumondas praticas en connex cun il diever d'IA en la lavur quotidiana. Il reglament d'IA pussibilitescha da promover innovaziuns per il public ed il service public, e quai a moda responsabla e segira.

Quest reglament fixescha il diever da l'IA entaifer la SRG SSR cun la finamira da mantegnair la confidenza da la publicitad e da garantir la credibladad redacziunala. El dat a tut las collavuraturas ed a tut ils collavuraturs in cler rom d'agir en in ambient marcà da progress tecnologics rasants.

Il diever da l'intelligenza artificziala en la SRG SSR po sustegnair l'elavuraziun da cuntegns, la producziun, la derasaziun, l'archivaziun, l'analisa dal public, l'accessibilitad senza barrieras ed ils process administrativs. En tut quests secturs vulain nus ademplir ils megliers standards pussaivels quai che riguarda la premura, il duair da render quint, la compliance e la responsabladad.

La SRG SSR dovra l'intelligenza artificziala a moda responsabla per ademplir sia incumbensa publica. L'IA na vegn mai duvrada mo per atgna finamira. Ses diever sto servir ad in intent da fatschenta cler, motivà e cumprovabel, p.ex. per meglierar la qualitat schurnalistica e l'experiencescha da las utilisadras e dals utilisaders, per optimar la chapientscha u l'accessibilitad da nossas purschidas, per augmentar la relevanza per la publicitad u l'effizienz per sustegnair in diever responsabel dals meds finansials.

Cunquai che la tecnologia, ils champs d'applicaziun ed ils basegns da l'interpresa, da las collavuraturas e dals collavuraturs e da las utilisadras e dals utilisaders sa midan a moda fitg svelta, vegn quest reglament adina puspè verifitgà e sviluppà («document en svilup»). Almain mintga sis mais ha lieu ina verificaziun sut la direcziun da la partiziun Data & AI Business.

## Cuntegn

|       |                                                                        |    |
|-------|------------------------------------------------------------------------|----|
| 1     | Princips fundamentals .....                                            | 4  |
| 1.1   | Confidenza publica .....                                               | 4  |
| 1.2   | Responsablidad e controlla umana .....                                 | 4  |
| 1.3   | Transparenza .....                                                     | 4  |
| 1.4   | Confidenzialitad e circumstanças contractualas e legalas .....         | 4  |
| 1.5   | Objectivitat e fairness .....                                          | 5  |
| 1.6   | Segirezza .....                                                        | 5  |
| 1.7   | Innovaziun e cultura d'emprender .....                                 | 5  |
| 1.8   | Perfecziunament dal persunal.....                                      | 5  |
| 1.9   | Ambient .....                                                          | 5  |
| 2     | Rom operativ .....                                                     | 6  |
| 2.1   | Confidenza publica .....                                               | 6  |
| 2.1.1 | Exempels per dievers nunlubids .....                                   | 6  |
| 2.1.2 | Exempels per dievers lubids.....                                       | 6  |
| 2.2   | Responsablidad .....                                                   | 6  |
| 2.3   | Transparenza ed obligaziun da marcar e d'inditgar il diever d'IA ..... | 7  |
| 2.3.1 | Marcar ed inditgar il diever d'IA en cuntegns .....                    | 7  |
| 2.3.2 | Marcar ed inditgar systems d'IA.....                                   | 7  |
| 2.4   | Sfera privata e protecziun da datas .....                              | 8  |
| 2.5   | Modas da diever betg lubidas.....                                      | 8  |
| 3     | Diever da tools d'IA lubì tenor moda d'utilisaziun.....                | 9  |
| 3.1   | Text .....                                                             | 9  |
| 3.1.1 | Elavuraziun da texts cun IA.....                                       | 9  |
| 3.1.2 | Translaziun cun IA .....                                               | 9  |
| 3.1.3 | Suttitels automatics .....                                             | 9  |
| 3.2   | Audio .....                                                            | 10 |
| 3.2.1 | Sintesa vocala.....                                                    | 10 |
| 3.2.2 | Clonar vuschs .....                                                    | 10 |
| 3.2.3 | Elements da musica generads cun IA.....                                | 10 |

|       |                                                                            |    |
|-------|----------------------------------------------------------------------------|----|
| 3.2.4 | Elavurar musica .....                                                      | 10 |
| 3.2.5 | Emetter musica generada cun IA .....                                       | 10 |
| 3.3   | Video.....                                                                 | 11 |
| 3.3.1 | Prolungaziun da videos .....                                               | 11 |
| 3.3.2 | Reutilisaziun da cuntegns .....                                            | 11 |
| 3.3.3 | Avatars .....                                                              | 11 |
| 3.3.4 | Sincronisaziun dals lefs .....                                             | 11 |
| 3.3.5 | Audios en videos .....                                                     | 11 |
| 3.4   | Maletgs .....                                                              | 12 |
| 3.4.1 | Crear da maletgs.....                                                      | 12 |
| 3.4.2 | Elavurar maletgs .....                                                     | 12 |
| 3.4.3 | Crear maletgs per il diever intern .....                                   | 12 |
| 3.5   | Visual Design .....                                                        | 12 |
| 3.6   | Meglieraziun e restauraziun tecnica .....                                  | 13 |
| 3.7   | Anonimisaziun .....                                                        | 13 |
| 3.8   | L'IA sco instrument per sustegnair l'administraziun .....                  | 13 |
| 3.9   | L'IA per la programmaziun.....                                             | 14 |
| 3.10  | Servetsch e support .....                                                  | 14 |
| 3.11  | L'IA en la perscrutaziun dal public .....                                  | 14 |
| 3.12  | Indexaziun e tagging .....                                                 | 15 |
| 3.13  | Agents d'IA.....                                                           | 15 |
| 4     | Experiments segirs cun IA e tools lubids en quel connex .....              | 15 |
| 5     | Disposiziuns finalas .....                                                 | 16 |
| 5.1   | Responsabladad per la verificaziun, l'actualisaziun e la publicaziun ..... | 16 |
| 5.2   | Aboliziun d'autras collecziuns da reglas.....                              | 16 |
| 5.3   | Entrada en vigur .....                                                     | 16 |

# 1 Principi fundamentals

## 1.1 Confidenza publica

Il diever da l'intelligenza artificziala na dastga betg sutminar la credibladad e la confidenza da la publicitad e sto garantir ch'il public na mettia mai en dumonda l'autenticitad, l'integritad u la fidabladad dals cuntegns da la SRG SSR.

## 1.2 Responsabladad e controlla umana

Ils instruments d'IA vegnan applitgads sut surveglianza umana ed a moda responsabla, etica, transparenta e conscienta da las ristgas per garantir la confidenza publica, la credibladad ed il princip d'objectivitat.

Mintga sistem pretenda in proprietari u ina proprietaria designada da l'IA ch'è responsabel per la qualitat e l'integritad dal sistem. Per l'integritad e la qualitat dals resultats è responsabla l'utilisadra u l'utilisader respectiv.

## 1.3 Transparenza

Nus communitgain il diever da l'intelligenza artificziala a moda transparenta en la publicitad, sche quel influenzescha a moda decisiva il cuntegn u sia percepziun. La trasparenza duess adina contribuir a la clerezza ed a la confidenza e betg promover in'etichettaziun exagerada che po effectuar in fauss maletg.

## 1.4 Confidenzialitad e circumstanças contractualas e legalas

Tgi che dovra l'IA sto resguardar la confidenzialitad (p.ex. secrets da fatschenta da la SRG SSR e da ses partenaris), il process d'acquisiziun da la SRG SSR (t.a. resguardar l'Application Governance da la SRG SSR) sco era las circumstanças contractualas (p.ex. cundiziuns d'utilisaziun da las applicaziuns e dals tools d'IA applitgads) e circumstanças legalas (p.ex. protecziun da datas, protecziun da la persuna, dretgs d'autur). Quai vala en mintga cas ed independentamain dal fatg, sche quest reglament fa attent danovamain da resguardar questas prescripziuns. Sche vegnan elavuradas datas da persunas, valan supplementarmain las directivas per la protecziun da datas la SRG SSR.

## **1.5 Objectivitat e fairness**

Il sistema intern d'IA e lur resultats ston vegnir verificads regularmain per identifitgar sfalsificaziuns potenzialas (bias) che pudessan donnegiar la fairness, la diversitad u l'integritad redacziunala, e per impedir, mitigiar u eliminar tant sco pussaivel lur consequenzas. Attenziun speziala èsi da far da las datas da trenament, dals resultats generads dals algoritmus e da lur consequenzas per las differentas gruppas en mira.

## **1.6 Segirezza**

Nus garantin la segirezza da tut ils systems d'IA cun protegger las datas, ils models e l'infrastructura cunter maldievers ed access nunautorisads. A maun da mesiras da segirezza e da compliance severas e d'ina surveglianza permanenta protegin nus nossas gruppas en mira, noss partenaris e l'integritad redacziunala.

## **1.7 Innovaziun e cultura d'emprender**

Nus promovain ina cultura d'innovaziun che favurisescha sin mintga nivel mirveglias, ina moda d'emprender cuntinuanta ed il plaschair d'experimentar cun IA. Nus dain a noss teams in rom segir che pussibilitescha ad els d'esser innovativs e da transfurmar nossa lavur en il senn dal public, faschond il medem mument attenziun da gestiunar bain las ristgas e da mantegnair la confidenza publica.

## **1.8 Perfecziunament dal persunal**

La SRG SSR s'oblighescha da promover las cumpetenzas en connex cun l'IA en l'entira interpresa cun colliar las scolaziuns, il barat davart las meglras praticas ed il sustegn dals teams, e quai en in ambient medial che sa mida a moda rapida e profunda.

En collavuraziun cun expertas ed experts interns vegnan introducids programs da scolaziun. Las personas da direcziun sin tut ils stgalims promovon la scolaziun, mettan a disposiziun las resursas necessarias e stgaffeschon ina cultura areguard l'IA responsabla, creativa ed orientada a las utilisadras ed als utilisaders.

## **1.9 Ambient**

La SRG SSR s'oblighescha da chattar, sviluppar e d'applitgar soluziuns d'IA effizientas per reducir las grevezzas per l'ambient.

## 2 Rom operativ

### 2.1 Confidenza publica

Ils systems d'IA na dastgan betg vegnir applitgads en ina moda che sveglia dubis areguard l'autenticitad dals cuntegns. Lur diever sto garantir ch'il public po differenziar cleramain tranter rapports creads d'umans e material generà u transformà cun agid d'IA.

#### 2.1.1 Exempels per dievers nunlubids

- Maletgs e videos fotorealistics generads cun IA che represchentan novitads, umans, lieus u situaziuns realas (p.ex. accident sin in'autostrada, lieu d'in delict).
- Audios u videos sintetics che pudessan vegnir sbagliads cun registraziuns realas da persunas u d'eveniments.

#### 2.1.2 Exempels per dievers lubids

- Illustraziuns cleramain betg fotorealisticas (abstractas, simbolicas, schematicas, artisticas).
- Cuntegns satirics u ficziunals, uschenavant ch'els èn identifitgabels cleramain sco tals e ch'els na cumparan betg en il conturn direct d'ina rapportaziun objectiva.

### 2.2 Responsablidad

Cunquai che la confidenza da la publicitad, la credibladad e l'objectivitat èn valurs centralas che ston vegnir protegidas, vegnan ils tools d'IA applitgads a moda responsabla, etica, transparenta e conscianta da las ristgas.

Ils cuntegns vegnan publitgads unicamain suenter ina verificaziun adequata; la responsablidad redacziunala è garantida da tut temp. En cas d'applicaziuns basadas sin IA sco chatbots na va la responsablidad betg via la verificaziun da mintga singul output, mabain via la concepziun, la direcziun e la surveglianza cuntinuada dal sistem cumplet.

La verificaziun po vegnir fatga tut tenor cas da diever u

- a maun d'ina validaziun avant la publicaziun (p.ex. audio, video u text) u
- a maun d'ina surveglianza e verificaziun umana cuntinuada en cas da systems autonomes.

Uschia pon ins garantir che er applicaziuns scalablas e dinamicas resguardian standards schurnalistics, la qualitat e la responsablidad.

## 2.3 Trasparenza ed obligaziun da marcar e d'inditgar il diever d'IA

### 2.3.1 Marcar ed inditgar il diever d'IA en cuntegns

**Text:** Per cuntegns basads sin text cun in process da recepziun redacziunal usità (in uman sto restar en il loop) na dovri nagina indicaziun speziala areguard il diever d'IA.

**Maletg/video:** Per cuntegns visuals generads cun IA è prescritta l'indicaziun (p.ex. «maletg generà cun IA: Adobe Firefly / RTR»). Per satira identifitgabla cleramain en ses context da program oriund n'èsi però betg necessari da marcar il diever d'IA. Sche tals cuntegns vegnan dentant publitgads separadamain u sco clips senza lur context oriund (p.ex. medias socialas), ston els vegnir marcads.

**Per ina postproducciun basada sin IA** (p.ex. meglierar la qualidad, curreger las colurs, supprimer las ramurs) na dovri nagina indicaziun, premess che la significaziun tematica na vegnia betg midada.

**Audio:** L'obligaziun da marcar e d'inditgar il diever d'IA sa differenziescha tut tenor cas d'applicaziun:

- Il diever da vuschs sinteticas en audios e videos sto vegnir inditgà.
- Il diever da musica generada cun IA sto vegnir inditgà, uschenavant che quella è identifitgabla.
- Il diever d'elements da musica generads cun IA (mood, trailer, jingles) na sto betg vegnir inditgà.

### 2.3.2 Marcar ed inditgar systems d'IA

**Chatbots:** En il cas d'ina interacziun cun in chatbot ston las utilisadras ed ils utilisaders vegnir infurmads ch'els communitgeschan cun ina maschina. Sch'il chatbot sa basa sin in'IA generativa, sto quai vegnir inditgà explicitamain. En pli sto vegnir inditgà in contact (adressa dad e-mail).

**Translaziun autonoma:** Cuntegns translats cun agid d'IA che vegnan publitgads u derasads senza ch'in uman als haja verifitgà u controllà, ston esser marcads cleramain sco translaziun generada cun IA.

**Agents d'IA:** Agents d'IA autonomi ston esser identifitgabels cleramain sco systems automatisads, sch'els interageschan cun utilisadras ed utilisaders u cun systems externs.

**Suttitels automatics:** Igl è d'infurmar cleramain las utilisadras ed ils utilisaders, sch'ils suttitels (live) vegnan generads automaticamain.

## **2.4 Sfera privata e protecziun da datas**

Cun duvrar l'IA sto vegnir resguardada la confidenzialitad. En spezial na vegnan betg endatadas en tools d'IA betg verifitgads e betg lubids (cump. però en quel connex il process d'acquisiziun da la SRG SSR, cif. 1.4) datas persunalas, cuntegns protegids cun il dretg d'autur u secrets da fatschenta da la SRG SSR e da ses partenaris da contract. Datas persunalas (nums, datas da contact, vuschs, fotos da purtret) èn da tractar cun precauziun particulara, era sch'ins dovra tools verifitgads. Igl è scumandà d'endatar talas datas en applicaziuns betg approvadas. Infurmaziuns internas confidenzialas respectivamain secretas na dastgan betg vegnir endatadas en tals tools.

Datas persunalas èn tut las infurmaziuns che sa refereschan ad ina persuna natirala identitigada u identitigabla. Quai cumpiglia tranter auter nums, vuschs, maletgs, datas da contact, datas da cumportament e tut las infurmaziuns che pussibiliteschan d'identitgar ina persuna.

Avant l'implementaziun sto mintga applicaziun d'IA (p.ex. chatbot) che elavura datas persunalas vegnir suttamessa ad in'examinaziun areguard la protecziun da datas. Sch'ins constatescha ristgas augmentadas, èsi da cumpigliar la persuna responsabla per la protecziun da datas da la SRG SSR.

## **2.5 Modas da diever betg lubidas**

- Endatar datas persunalas u confidenzialas en tools betg approvads.
- Chargiar si documents interns, scripts u material da basa en servetschs d'IA externs betg approvads.



### **3 Diever da tools d'IA lubì tenor moda d'utilisaziun**

#### **3.1 Text**

##### **3.1.1 Elavuraziun da texts cun IA**

Tools d'IA èn lubids per incumbensas accompagnantas sco retschertgar e generar ideas (cun verifitgar ils fatgs), survegliar temas, crear titels, posts per las medias socialas, resumaziuns e bullet points sco era rediger e transcriber texts, transfurmar lingua en text, far optimaziuns (inclus Search Engine Optimization SEO, Answer Engine Optimization AEO, Open Source Intelligence OSINT), far retschertgas investigativas, analisar grondas bancas da datas e verifitgar l'ortografia u la grammatica.

Mintga resultat d'ina retschertga fatga cun tools d'IA sto adina vegnir verifitgà d'ina schurnalista u d'in schurnalist.

##### **3.1.2 Translaziun cun IA**

Tools da translaziun basads sin IA pon ins duvrar sco sustegn per crear cuntegns e per process da lavur interns, uschenavant che la responsabladad per l'exactadad e l'integritad resta attribuida cleramain. Las translaziuns ston vegnir integradas en in process da controlla da la qualitat definì per garantir lur fidabladad e lur consistenza.

##### **3.1.3 Suttitels automatics**

Suttitels automatics (live) a basa da la reconuschienscha vocala (ASR) pon ins duvrar per meglierar l'accessibilitad senza barrieras e per augmentar la disponibladad dals cuntegns, premess ch'ins defineschia autas limitas da qualitat (controlla da l'acceptanza cun far tests d'utilisadras e d'utilisaders) ch'ins ademplescha cun las survegliar ed optimar cuntinuantamain (p.ex. quota da sbagls, chapibilitad).

Sin fundament dal character sensibel dal cuntegn sto vegnir applitgada per il gener Infurmaziun (p.ex. «19h30», «Tagesschau») ina limita da qualitat particularmain: In uman sto restar en il loop, uschè ditg che las pussaivladads tecnicas na cuntanschan betg la qualitat quasi perfetga che garantescha oz ina persuna che fa ils suttitels.

## **3.2 Audio**

### **3.2.1 Sintesa vocala**

Igl è lubì da duvrar vuschs artificialas p.ex. per leger cuntegns da text u per metter a disposiziun audiodescripziuns u sincronisaziuns, sch'il diever n'irritescha betg il public e sch'il diever d'IA vegn inditgà (vesair 2.3.1.).

Sch'igl è strusch pussaivel d'esser transparent cun far in'indicaziun correspundenta quai che riguarda il diever da vuschs artificialas senza restrenscher considerablmain l'experiencescha da las utilisadras e dals utilisaders u reducir la clerezza dal cuntegn (p.ex. per novitads curtas, posts), na duess ins betg duvrar l'IA. En tals cas ston ins considerar ina soluziun alternativa.

### **3.2.2 Clonar vuschs**

Nus na clonain naginas vuschs da personas realas, auter ch'en la satira ed en contribuziuns redacziunalas che tematiseschan l'IA. Quai vul dir che la SRG SSR na dastga betg duvrar ina vusch registrada d'ina persona reala per crear ina versiun generada cun IA cun l'intent da sincronisar videos da la persona en in'autra lingua u per producir auters cuntegns d'audio u da video (p.ex. vusch d'ina moderatura da televisiun per in chatbot u per overvoicing).

### **3.2.3 Elements da musica generads cun IA**

Igl è lubì da generar elements da musica u da duvrar elements da musica generads artificialmain per elements da layout, moods, trailers e logos. Sche nus generain sezs ils elements da musica, èsi da duvrar in tool approvà da la SRG SSR.

### **3.2.4 Elavurar musica**

Igl è lubì da far pitschnas adattaziuns da registraziuns e d'elements da musica necessarias per ils basegns da radio e televisiun (p.ex. tagls, surpostaments u adattaziuns dal volumen) cun in tool d'IA, sche quests process na donnegian betg l'agen character da l'ovra e na limiteschan betg ils dretgs persunals da l'autur da ses possessur dals dretgs.

### **3.2.5 Emetter musica generada cun IA**

Da princip èsi lubì d'emetter musica generada per part u dal tuttafatg cun IA, la quala vegn messa a disposiziun d'ina artista u d'in artist u d'ina firma da musica, sch'ella ademplescha ils criteris da qualitad da la SRG SSR. Cunquai ch'i n'è tecnicamain betg adina pussaivel da constatar, sch'ina ovra è vegnida generada per part u dal tuttafatg cun IA, na po la SRG SSR betg surpigliar in'obligaziun sistematica da cumprova.

Cunquai ch'i dat sin il martgà avunda musica da tut ils genres che sa cunfa cun il concept e la pretensiun redacziunala da noss chanals e cunquai che las dumondas da la

branscha da musica concernent il dretg d'autur en connex cun l'IA n'èn betg scleridas, renunzia la SRG SSR da crear atgnas chanzuns artificialas per nossa rotaziun da musica. Igl è però lubì da crear chanzuns cun in'IA generativa per intents redacziunals (p.ex. per in'emissiun davart musica generada cun IA) u en la satira.

### **3.3 Video**

#### **3.3.1 Prolungaziun da videos**

I n'è betg lubì da prolungar intervistas, tuns originals e material da video cun in connex real concret (p.ex. prolungar maletgs da colonnas actualas davant il Gottard).

Igl è lubì d'amplifitgar e da duvrar cun agid d'IA sequenzas da video originaras, simbolicas senza connex real concret (p.ex. daguts da plievgia sin la fanestra). Per quel diever valan las directivas publicisticas e l'obligaziun da diligenza schurnalistica.

#### **3.3.2 Reutilisaziun da cuntegns**

Igl è lubì da transfurmar automaticamain formats lungs en formats verticals curts per las medias socialas. Quai cumpiglia il tagl intelligent (per centralisar il motiv) e la creaziun da las legendas. Ils resultats ston vegnir verifitgads avant la publicaziun.

Igl è lubì da producir automaticamain cun IA clips e sequenzas (p.ex. trailers u cuntegns socials), sch'els sa basan dal tuttafatg sin material original (p.ex. in punct culminant dal sport), sch'els n'èn betg generads ulteriuramain cun IA e sch'ils standards redacziunals da la SRG SSR èn ademplids.

#### **3.3.3 Avatars**

Il diever dad avatars è lubì mo per promover l'accessibilitad senza barrieras ed en connex cun contribuziuns redacziunals davart l'IA.

#### **3.3.4 Sincronisaziun dals lefs**

La sincronisaziun dals lefs basada sin IA dastga vegnir duvrada per cuntegns ficziunals (p.ex. producziuns sincronisadas en pliras linguas). Il diever è però lubì exclusivamain per la ficziun. Tut las pretensiuns giuridicas e contractualas inclus tut ils dretgs da las acturas e dals acturs ston vegnir resguardads.

#### **3.3.5 Audios en videos**

Las reglas en il sector d'audio valan era per audios en videos.

### 3.4 Maletgs

#### 3.4.1 Crear da maletgs

Maletgs generads cun IA na remplazzan betg il fotoschurnalissem e na dastgan betg vegnir duvrads per represchentar situaziuns cun in connex real concret. Maletgs generads cun IA na dastgan era betg vegnir duvrads per simular facticitad cun represchentar realisticamain creatiras, cuntradas u situaziuns. Quai engiona il public.

Ins dastga duvrar maletgs generads cun IA, uschenavant ch'els na procuran betg per intschertezza, schebain lur cuntegn represchenta in eveniment real u la realitad. Igl è da far atenziun cun represchentar fatschas u umans, lieus, objects e marcas identifitgables, perquai ch'il privel d'engianar il public è en quests cas il pli grond.

#### 3.4.2 Elavurar maletgs

En general èsi lubì da duvrar applicaziuns d'IA per elavurar maletgs (p.ex. per meglierar la qualitad dals maletgs, tagliar).

I n'è betg lubì da duvrar applicaziuns d'IA per elavurar maletgs en la rapportaziun autentica (novitads, sport, films documentars, euv.), sche vegn sfalsifitgada la realitad. Quai vala en connex cun agiuntar, midar u allontanar elements dal maletg cun IA ed en connex cun in'elavuraziun exagerada, p.ex. correcturas da la colur stravagadas che midan considerablmain l'impressiun visuala.

Agiuntar, cumpletter u allontanar elements cun agid d'IA è lubì mo là, nua ch'ins fascheva quai en la pratica gia avant il diever d'IA, p.ex. per collaschas per in thumbnail da Youtube u en in ambient cleramain ficziunal u satiric.

En cas d'in diever precaut ordaifer la rapportaziun autentica è lubì generative fill (er: Outpainting).

#### 3.4.3 Crear maletgs per il diever intern

Ins po duvrar senza restricziuns maletgs generads cun IA per accelerar process interns, sch'els n'èn betg destinads per la publicaziun directa (p.ex. storyboarding, maletgs en preschentažiuns da powerpoint).

### 3.5 Visual Design

Ins po duvrar tools d'IA per intents da concepziun visuals sco chartas meteorologicas, culissas virtualas, animaziuns didacticass, infograficas u per illustrar concepts abstracts, uschenavant ch'ins evitescha in fotorealissem engianaivel ed uschenavant ch'ins

verifitgescha ils resultats segund ils standards redacziunals da la SRG SSR avant l'utilisaziun.

Era per visualisar datas èsi lubì da duvrar tools d'IA.

Per impedir ina violaziun dal dretg d'autur u dal dretg da marcas èsi da far attenziun cun crear illustraziuns, graficas ed animaziuns ch'il model d'IA n'imiteschia u na copieschia betg stilisticamain ovras da terzs protegidas.

### **3.6 Meglieraziun e restauraziun tecnica**

Ins po duvrar tools d'IA per restaurar audios e videos, per sustegnair rushes e per far adattaziuns tecnicas (p.ex. curreger ramurs u colurs), premess ch'il cuntegn redacziunal u il cuntegn dal maletg na vegnian betg sfalsifitgads. En quest cas d'applicaziun èsi lubì d'allontanar objects irrelevantes en maletgs e videos, nun ch'il material original saja ina registraziun d'in eveniment da novitads.

Il medem princip vala per material istoric: La meglieraziun cun IA na dastga allontanar naginas características distintivas (p.ex. ramurs da fund en registraziuns sonoras archivadas da l'onn 1952), sche tals elements fan part da l'autenticidad istorica.

### **3.7 Anonimisaziun**

Per anonimisar ina funtauna (p.ex. remplazzar la vusch d'ina persuna cun ina vusch sintetica) èsi lubì da duvrar tools d'IA per masclar u trasformar las características, a maun da las qualas ins pudess identifitgar la persuna. Las datas persunalas oriundas dastgan vegnir duvradas unicamain per crear la versiun anonimisada. Ellas na dastgan vegnir tradidas en nagin cas.

### **3.8 L'IA sco instrument per sustegnair l'administraziun**

Ins pos duvrar applicaziuns d'IA sco sustegn per incumbensas che regardan l'administraziun e las finanzas, p.ex. per generar prognosas e rapports, per elavurar documents ed automatisar process da lavur. Il diever d'IA na remplazza però betg las vias da verificaziun etablidas, las controllas internas u ils mecanissem da render quint. Prognosas e recumandaziuns che sa basan sin IA ston vinavant vegnir controlladas e verifitgadas dad umans.

L'approvaziun automatica da pajaments, da cudeschaziuns finanzialas u da transacziuns liantas è scumandada, nun che quella saja vegnida lubida expressivamain

en in rom da controlla definì che garantescha la suandabladad, l'observaziun e la surveglianza.

Tools d'IA pon sustegnair incumbensas administrativas en il sector da las resursas umanas, na dastgan però betg vegnir duvrads per la valitaziun definitiva da candidatas e candidats, per decisiuns da selecziun u per decisiuns automatisadas che han consequenzas directs per personas. Cunquai che datas persunalas pon esser particularmain sensibilas, èsi indispensabel da resguardar las prescripziuns en connex cun la protecziun da la sfera privata e da la protecziun da datas.

### **3.9 L'IA per la programmaziun**

Tools d'IA per codar dastg'ins duvran per automatisar incumbensas tecnicas (svilup, tests, documentaziun), premess che lur diever correspundia als princips etics, a la trasparenza ed a l'obligaziun da render quint da la SRG SSR. L'entir code basà sin IA sto vegnir verificatgà d'ina sviluppadra u d'in sviluppader qualifitgà e vegnir validà da questa persona sco correct e segir. Questa sviluppadra u quest sviluppader surpiglia la responsabladad cumplina per la correctadad e la segirezza dal code e garantescha che vegnian resguardadas las disposiziuns legalas ed ils standards technics interns.

### **3.10 Servetsch e support**

**Chatbots / agents da conversaziun:** Agents da conversaziun dastgan vegnir duvrads per intents interns e publics, inclus l'interacziun cun il public e l'access a cuntegns, premess ch'els adempleschian las pretensiuns da la protecziun da datas e ch'els lavurian entaifer cas d'applicaziun definids cleramain. Els ston vegnir survegliads e controllads regularmain, cuntegnair process structurads per dar resuns e per verificgar ils fatgs ed avair ina possessura u in possessur uman identifitgabel cleramain. Quella persona procura che la confidenza da la publicitad na vegnia betg donnegiada e ch'ils standards redacziunals vegnian resguardads.

### **3.11 L'IA en la perscrutaziun dal public**

L'IA dastga vegnir duvrada sco instrument per emprender d'enconuscher e per chapir meglier ils basegns, las spetgas e las modas da cumportament dal public. In tal diever sto resguardar ils princips da la protecziun da datas e servir a l'incumbensa publica da la SRG SSR cun meglierar la relevanza, l'accessibilitad e la qualidad da las purschidas da la SRG SSR.

### 3.12 Indexaziun e tagging

Igl è lubì da duvrar tools d'IA per indexar e per crear chavazzins per cuntegns, per analisar hashtags, per identifitgar tendenzas e per far incumbensas colliadas cun qui per meglierar metadatas, premess ch'il senn redacziunal restia mantegnì e che las disposiziuns da governance e da la protecziun da datas vegnian resguardadas.

### 3.13 Agents d'IA

La SRG SSR lubescha da duvrar agents d'IA autonomes per sustegnair ses process, uschenavant ch'els opereschan entaifer in mandat strict che definescha lur finamiras e lur radius d'acziun. Lur diever è limità al cas d'applicaziun previs oriundamain; mintga nov cas d'applicaziun sto vegnir testà e valità avant l'utilisaziun u la transmissiun.

La responsabladad generala ha in Product Owner designà. En architectures complexas è la responsabladad situada sin il nivel dal sistem general e betg sin il nivel da singuls subagents.

Mecanissem da surveglianza adequats – sco il monitoring, la suandabladad da las accziuns, la pussaivladad da surpigliar manualmain ed in interruptur d'urgenza – ston esser avant maun per controllar las ristgas (inclus bias). Ils systems d'IA na dastgan betg prender decisiuns finalas senza ina verificaziun umana, sche quellas han effects sin ils dretgs individuals da personas u sin la publicaziun da datas sensibilas.

Sch'in agent interagescha cun systems externs (p.ex. via dumondas automatisadas), sto el esser identifitgabel cleramain sco sistem automatisà.

## 4 Experiments segirs cun IA e tools lubids en quel connex

Experimenter cun l'IA è giavischè, sto però avair lieu en ambients serrads e controllads. Cas d'applicaziun fitg ristgants pretendan ina prevalidaziun ed ina lubientscha speziala da Datas ed IA d'interpresa. Tools betg approvads èn limitads strictamain a l'elavuraziun da datas publicas.

Tests che cuntegnan in'interacziun cun la publicitad (p.ex. chatbots u auters systems basads sin dialog) na valan betg sco experiments serrads e dastgan vegnir realisads mo suenter ina validaziun precedentia da las ristgas, cun inditgar cleramain ch'i sa tractia d'in test, cun applitgar mesiras per la protecziun da datas pli vastas che usitadamain e cun analisar criticamain ils resultats.

## **5 Disposiziuns finalas**

### **5.1 Responsabladad per la verificaziun, l'actualisaziun e la publicaziun**

Responsabel per la verificaziun, l'actualisaziun e la publicaziun dal reglament preschent è Datas ed IA d'interpresa. Ina verificaziun ha lieu almain mintga sis mais. En cas da basegn èn dumondas per midadas d'inoltrar al comité directiv da la SRG SSR.

### **5.2 Aboliziun d'autras collecziuns da reglas**

Las directivas existentas areguard il diever da l'intelligenza artificiala sco er ils principals nazionals d'IA da la SRG SSR vegnan abolids per ils 31-05-2026.

### **5.3 Entrada en vigor**

Il comité directiv ha relaschà quest reglament ils 21 d'avrigl. El entra en vigor il 1. da zercladur 2026.



Susanne Wille, directura generala SRG SSR